

Na osnovu člana 30. stav (1) tačka r) i stava (2) i člana 47. Zakona o platama i naknadama u institucijama Bosne i Hercegovine („Službeni glasnik BiH“ br. 50/08 i 35/09), čl. 87. i 88. Zakona o radu u institucijama Bosne i Hercegovine („Službeni glasnik BiH“, br. 26/04, 7/05 i 48/05) i člana 17. Zakona o Vijeću ministara Bosne i Hercegovine („Službeni glasnik BiH“, br. 30/03, 42/03, 81/06, 76/07, 81/07, 94/07 i 24/08), Vijeće ministara Bosne i Hercegovine na 93. sjednici, održanoj 2. jula 2009. godine, donijelo je

ODLUKU

o načinu i postupku ostvarivanja prava na naknadu za prekobrojnost u institucijama Bosne i Hercegovine

Član 1.

(Predmet Odluke)

Ovom Odlukom uređuje se način i postupak ostvarivanja prava državnih službenika na naknadu za prekobrojnost, u skladu sa članom 47. stav (1) Zakona o platama i naknadama u institucijama Bosne i Hercegovine i prava zaposlenih na platu u slučaju stavljanja na raspolaganje, u skladu sa članom 47. stav (2) Zakona o platama i naknadama u institucijama Bosne i Hercegovine i čl. 87. i 88. Zakona o radu u institucijama Bosne i Hercegovine.

Član 2.

(Visina naknade)

- (1) U slučaju razrješenja državnog službenika zbog prekobrojnosti, državni službenik s radnim stažom do 15 godina ima pravo na otpremninu u iznosu od šest svojih neto plata izuzimajući novčanu nagradu i naknadu za obavljanje poslova drugog radnog mjesta.
- (2) U slučaju razrješenja državnog službenika zbog prekobrojnosti, državni službenik s radnim stažom od najmanje 15 godina ima pravo na otpremninu u iznosu od 12 svojih neto plata izuzimajući novčanu nagradu i naknadu za obavljanje poslova drugog radnog mjesta.
- (3) Zaposleni, koji je stavljen na raspolaganje u smislu člana 87. Zakona o radu u institucijama Bosne i Hercegovine, ostvaruje pravo na isplatu plate na način i u rokovima utvrđenim članom 88. Zakona o radu u institucijama Bosne i Hercegovine.

Član 3.

(Obračun i isplata naknade)

Obračun i isplata naknade za prekobrojnost za državne službenike i plate za zaposlene koji su stavljeni na raspolaganje u institucijama Bosne i Hercegovine vrši se uz mjesečni obračun i isplatu plata i naknada zaposlenih u institucijama BiH na osnovu rješenja o prekobrojnosti odnosno Odluke o stavljanju na raspolaganje izdatog od strane rukovodioca institucije.

Član 4.

(Institucije odgovorne za provođenje Odluke)

Za realizaciju ove Odluke zadužuju se institucije Bosne i Hercegovine i Ministarstvo finansija i trezora.

Član 5.

(Stupanje na snagu)

Odluka stupa na snagu narednog dana od dana objavljivanja u „Službenom glasniku BiH“.

VM broj 178/09
02.07.2009. godine
Sarajevo

PREDSJEDAVAJUĆI
VIJEĆA MINISTARA BIH
dr. Nikola Špirić